

**Kalaallit Nunaanni aalisarnermi pisarineqartut isumalluutinik atuinermut akitsuutaat  
pillugit Inatsisartut inatsisaata allanngortinneqarneranik Inatsisartut inatsisaat  
Aningaasaqarnermut Nunamullu Namminermut Naalakkersuisumit saqqummiunneqartoq**

**pillugu**

**Aningaasaqarnermut Akileraartarnermullu Ataatsimiititaliap**

**siunnersuutip pingajussaaneernejarneranut**

**ILASSUTITUT ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Jens Napaattoq, Naleraq, siulittaasoq  
Inatsisartunut ilaasortaq Erik Jensen, Siumut, siulittaasup tullia  
Inatsisartunut ilaasortaq Hans Aronsen, Inuit Ataqtigiiit  
Inatsisartunut ilaasortaq Agathe Fontain, Inuit Ataqtigiiit  
Inatsisartunut ilaasortaq Aqqalu Jeremiassen, Atassut  
Inatsisartunut ilaasortaq Vivian Motzfeldt, Siumut  
Inatsisartunut ilaasortaq Jens-Frederik Nielsen, Demokraatit

**1. Siunnersuutip Inatsisartunit aappassaaneernejarnera**

Ataatsimiititaliap aappassaaneerinninnissamut isumaliutissiissummini Naalakkersuisunit akisassanik apeqquteqarpoq. Taamaattumillu siunnersuut una pingajussaaneernejarneranni ataatsimiititaliamit suliarineqaqqittussanngorluni innersuuteqqinneqarnissaa ataatsimiititaliamit kissaatigineqarpoq. Innersuusseqqinnissami siunertaavoq akissutit Naalakkersuisunit aappassaaneerinninnissamut saqqummiunneqartut suliarineqarnissaat.

Taamatut innersuusseqqinnissaq aappassaaneerinninnermi tapersorsorluarneqarpoq.

**2. Naalakkersuisunut apeqquteqaqqinneq**

Naalakkersuisunut apeqquteqaqqinnissaq ataatsimiititaliamit pisariaqartinneqarsimavoq. Taakku ilanngussaq A-tut ilanngunneqarput. Naalakkersuisut taakkununga akissutaat ilanngussaq B-tut ilanngunneqarput. Naalakkersuisut taakkununga akissutaat ilanngussaq B-tut ilanngunneqarput. Akissutit taakku tunngavigalugit Aningaasaqarnermut Nunamullu Namminermut Naalakkersuisup siunersiorneqarnissaa ataatsimiititaliamit pingaartinneqarpoq. Siunersiuinissamut aggeqqusissut ilanngussaq C-tut ilanngunneqarpoq aammalu siunersiuinermut allakkiaq ilanngussaq D-tut ilanngunneqarluni. Akinissamut sivikitsumik

periarfissaqartinneqarlutik Naalakkersuisut akissuteqarnerat ataatsimiititaliap aallarniutigalugu qujassutigaa. Siuliani allassimasut tunngavigalugit pingajussaaneerinninnissap kinguartinneqarnissaa ataatsimiititaliamit Inatsisartut Siulittaasoqarfiannut qinnutigineqarpoq.

### 3. Naalakkersuisut ataatsimiititaliap apeqqutaanut akissutaat

Akissutit inatsisissatut siunnersuutip matuma aappassaaneerineqarnissaanut Naalakkersuisunit saqqummiunneqartut kiisalu pingajussaaneerinninnissaq sioqqullugu apeqqutigineqartut matuma kinguliani ataatsimiititaliamit isummerfigineqarput.

#### 3.1. Allaffissornerup annertussusia

*Tunisinermi akiligassat allagartaasa amerlassusiat:*

Uppernarsaasersuinissamik piumasaqaammi inuussutissarsiummut tamarmut agguataarlugu tunisinermi akiligassat allagartaat ukiumut 250-it missaat pineqartut aappassaaneerinninnissamut Naalakkersuisut akissuteqaamminni paasissutissiissutigaa. Kisitsit taanna inuussutissarsiutip nunatta avammut tunisaanut pingaaruteqassusia eqqarsaatigigaanni appasittutut ataatsimiititaliamit isigineqarpoq. Ataatsimiititaliap kingorna apeqqutaanut akissutiminni Naalakkersuisut kisitsit taaneqartoq uppersarparaat. Takussutissiami kisitsit tunisinermi akiligassat allagartaannut 254-inut naatsorsorneqarsimavoq, tamannalu missingiutigeqqaakkat iluanniippoq (ilanngussaq B, akissut 1).

Kiisalu siunnersuinerimi ima paasissutissiisoqarpoq:

*“Akiligassiissutit amerlassusaannik naliliinermi taamaallaat kilisaatinit uutiterisunit avammut tunisassianik tunisinermi akiligassiissutit pineqarnerat eqqaamaneqassaaq, taamaalillunilu nunamut tunisanit tunisassianilluunniit kiisalu aalisakkerivinnit avammut tunisat pineqarnatik.” (ilanngussaq D, akissut 1)*

*Naalakkersuisut allaffissornerunermik naliliinerat:*

Siunnersuutip allaffissornerussutaanerunissaata annertussusissaa, tassungalu ilanngullugu uppersaasersuinerup annertussusia pillugu Naalakkersuisut qanoq misilittagaqarnersut, itisilerneqassasoq Inatsisartut aappassaaneerinninnissaanut isumaliutissiissummi ataatsimiititaliap qinnutigaa. Aappassaaneerinninnissamut akissuteqaat tunngavigalugu naliliinertik una ataatsimiititaliap ilassutit isumaliutissiissummut matumunnga atugassaatut itisileqqullugu Naalakkersuisut ataatsimiititaliamit qinnuigineqarput:

*”Naalakkersuisut naliliipput, suliffeqarfinnut oqartusanullu allaffissornerulerneq qaangerneqarluarsinnaasoq” (ilanngussaq A, apeqqu 2).*

Akissut ataatsimiititaliamit qujassutigineqarpoq Naalakkersuisullu akissutaanni una maluginiarneqarluni:

*”Ingerlatseqatigiiffiit tunisinermi akiligassiissutinik assiliillutillu scannernissaat taakkunangalu akitsuutinik nalunaaruteqarnermi ilanngussinissaat inatsisissatut siunnersuutip taamaallaat nassatarissavaa. Taamaalilluni suliassaq aalisartitseqatigiiffinnit ingerlanneqareersoq matumani pineqarpoq. Taamaalillunilu suliassaq ingerlatseqatigiiffinnut killilimmik allaffissornikkut kingunerisassaq pineqarpoq” (ilanngussaq B, akissut 2)*

Naliliineq siuliani allassimasoq siunnersuineri aamma itisilerneqarpoq. Ilanngussaq D ataatsimiititaliamit innersuussutigineqarpoq.

*Allaffissornerup appartinneqarnissaanik Naalakkersuisut anguniagaat*

Allaffissornerup appartinneqarnissaanik Naalakkersuisut anguniagaqarnerannut inatsisissatut siunnersuut una naapertuunnersoq ataatsimiititaliap ilassutitut isumaliutissiissummut matumunnga atugassatut Naalakkersuisunut apeqqutigineqarpoq (ilanngussaq A, apeqqut 3). Naalakkersuisut akissutiminni allapput pitsaaqutit ajoqutillu oqimaalutarneqarsimasut. Akissummillu uku ataatsimiititaliamit maluginiarneqarput:

*”Illuatungaani Naalakkersuisut pisortat ingerlatsiviannik nutartererusupput allaffissornermillu annikillisaajumallutik. Illuatungaatigulli aamma aalisarneq nunatsinni inuussutissarsiutit pingaarnepaartaraat. Ilaatigut tamanna tunngavigalugu aalisarneq akileraartarnikkut, aningaasaqarnikkut politikikkullu pingaarutilimmik inissisimavoq.” (ilanngussaq B, akissut 3).*

Itisiliineq taanna Naalakkersuisunit isumaliutigineqartunut tapersiisoq ataatsimiititaliamit tiguneqarmat uppersararneqarpoq.

### **3.2. Paasissutissanik toqqortarinnineq avitseqateqarnerlu**

Naalakkersuisut aappassaaneerinninnissamut akissuteqaatikkut akissutaat sukumiisoq ataatsimiititaliamit qujassutigineqarpoq akissuteqaallu annertunerusumik oqaaseqaatissaqarfigineqanngilaq.

### **4. Ataatsimiititaliap inassuteqaatai**

**Siunnersuut akuerineqassasoq ataatsimiititaliamit isumaqatigiittumit inassutigineqarpoq.**

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut pingajussaaniigassanngortippaa.

---

Jens Napaattooq  
Siulittaasoq

---

Erik Jensen  
Siulittaasup tullia

---

Agathe Fontain

---

Vivian Motzfeldt

---

Hans Aronsen

---

Jens-Frederik Nielsen

---

Aqqalu Jeremiassen